



ASIA per Tanaim fluvium, & per lineam à Granduico Oceani
versus Boream portu ad dicti fluij fontem tractam, ab Euro-
pa discriminatur, ab Africa verò per Isthmum inter Mare Me-
diterraneum & Mare rubrum. seu vt quibusdam placet qui A-
rabiam Africæ attribuunt, per lineam ab intimo Maris Persici
recessu ad proximum vsque Mediterranei littus ductam, reli-
qua latera Oceanus ambit. Veteres Asiam hanc multifariam
diuiserunt. Hodie verò apertissime in quinque diuiditur partes,
secundum Magnatum in ea dominantium numerum. Harum
prima ea est quæ Europæ vicina magno Moscouitarum Princi-
pi pareat, finiturque glaciali Oceano, fluij Oby, lacu Kytaiæ,
atque inde rectissima ad mare Caspium ducta linea, vbi videlicet Isthmum facit inter se &
Pontum Euxinum. Secunda pars quæ magno Tartarorum Chamo subiecta versus Meridiem
porrigitur ad mare Caspium, fluium Iaxartem, & Imaum montem: versus Eum & Austrum
Oceano finitur: versus Zephyrum autem prædicto Moscouitarum regno. Tertiæ eius par-
tem Othomannorum stirps possidet, comprehenditque omnes terras inter Euxinum, Aegæ-
um, Mare magnum, Aegyptum, Rubri ac Persici Marium portus, Tigrim, & Isthmum inter
Caspium & Euxinum Mariæ. Quarta pars comprehendit Sophy siue Persarum Regum Impe-
rium, quod ab Occidente Othomannorum, cum quibus continuum ipsis bellum est, respicit
imperium: à Septentrione magni Chami terras: ab Ortū Indi fluij viciniam: à Meridie
verò Oceanum Indicum. Quinta & vltima eius pars est India quam hodie Orientalem vo-
camus, iisdemque hodie quibus olim finibus terminatur. hæc autem non vni tantum vt cæte-
ra, sed pluribus subiecta est principibus, quæuis enim huius prouinciarum proprium habet
dominum: earumque nonnullæ magno Chamo subiectæ sunt ac tributariæ. Sed nec illud ig-
norari debet, omnes propemodum locos à prædicto portu Arabiæ ad Lampobum vsque pro-
montorium Oceano adiacentes (vt proximè trigessimum Borealis latitudinis gradum vide-
re est) ad Portugaliæ Regem spectare, aut saltem tributarias ipsi esse. Inter omnes ad Asiam
pertinentes insulas (quarum innumerae penè sunt) hæc primarias ponunt: Cyprum, in Mari
Mediterraneo: in Oceano autem Indico, in quo etiam patrum nostrorum memoria vtraque
Iaua reperta est, Taprobanam quam nonnulli Zeilanam insulam esse existimant, Borneo, ce-
lebris, Palohan, Mindanao, Gilolo, & Moluccas ex quibus hodie varias aromatum species
deportant. Hæc etiam omnes vincit Iaponica insula, & noua nuper inuenta Guinea, de qua
hactenus dubitatum fuit, ineulane an continuum cum Magellanica fuerit: donec Batavorum,
Anglorum, & Hispanorum perlustrationibus Marinis insulam esse comptum est. vnde etiam
rectius Magellanica siue Terræ Australi (quam incognitam permulti quoque vocant) utpote
cui vicinior est, quam huic Asiæ annumerari conueniret. Hæc Terræ pars propter primas in
ea monarchias, vt Assyriorum, Persarum, Babyloniorum, & Medorum, non apud prophæ-
tas tantum auctores, sed sacrorum quoque Bibliorum scriptores præ cæteris celebratissima
semper fuit. Legimus enim, in hac non modò primos nostros parentes à Deo optimo max.
conditos, & in peccatum lapsos postea beneficio Saluatoris Christi summo Patri reconcili-
atos: sed omnes tam veteris quam noui Testamenti historias (vix paucis exceptis) & scri-
ptas & peractas esse. Asiam hanc Strabo describit libro 11. & s. proximè sequentibus. Descri-
bit eandem Ptolemæus lib. 5. & duobus proximè sequentibus: idem facit in duodecim suis
tabulis, tribuitque ipsi non minus quadraginta prouincijs. Attingit eandem Diodorus Sicu-
lus initio decimi octauæ sui libri. Ex recentioribus nemo particulariter eam descripsit. M.
Paulus Venetus, Ludouicus Vartomannus, & Ioannes Monteillanus (qui non immerito ve-
luti fabulosus ab alijs ridetur) ea tantum quæ in itinere animaduenerunt & notatu digna æ-
stimarunt, conscribere. De hac etiam consulas Iacobi Nauarchæ Iesuitarum ordinis episto-
lam. Ortelius eandem quoque in magna quadam tabula nuper designauit & conscripsit.



